



*Les Egyptiens à cause de la famine, sont contraints de vendre au Roy tous leurs biens pour auoir du bled.*

**L**A famine fut si grande & continuelle en Egypte, que le peuple affamé vendoit tout ce qu'il auoit pour auoir des viures, en sorte que rien ne leur restoit que leurs terres, qu'ils furent enfin contraints de vendre au profit du Roy, dont pour cét effect certains Commissaires furent establis par Ioseph. Ainsi furent acquises toutes les terres du peuple, & annexées au domaine du Roy. Or la famine augmentoit de plus en plus, de sorte que le pauvre peuple fut contraint d'estre vendu pour esclau, afin d'auoir de la semence, & que la terre ne fust du tout desolée. Mais Ioseph qui auoit superintendance sur toutes les affaires du Roy, remit és mains des Egyptiens toutes leurs terres ja acquises, à la charge toutesfois de les labourer, & semer, & d'en bailer la cinquiésme partie de la cueillette de chacune année au Roy; ce que le peuple accorda tres-volontiers. Et lors ils labourerent d'un grand courage: ils rendirent graces au Roy de ce bien-faict, & à Ioseph; lequel fut depuis bien voulu de tout ce peuple, qui accorda cette coustume & ordonnance estre écrite, laquelle ils obseruerent par apres.